



Broj: **03/1-50-14-7-19/13**

Sarajevo, 24. 1. 2013.

**PREDMET: Informacija o bilateralnoj posjeti Republici Hrvatskoj, Zagreb, 11. i 12. 12. 2012.**

U skladu sa usvojenim Planom rada za 2012. godinu, Zajednička komisija za odbranu i sigurnost BiH je, 11. i 12. 12. 2012., boravila u bilateralnoj posjeti institucijama vlasti Republike Hrvatske.

U delegaciji Zajedničke komisije u ovoj bilateralnoj posjeti bili su: Dušanka Majkić, predsjedavajuća, Nermina Zaimović - Uzunović i Krunoslav Vrdoljak, članovi Zajedničke komisije, te Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Bilateralna posjeta Republici Hrvatskoj realizirana je uz podršku Misije OSCE-a u BiH.

**11. 12. 2012.**

Prvog dana radne posjete članovi Zajedničke komisije boravili su u radnoj posjeti Hrvatskom saboru.

Predstavnike Zajedničke komisije za odbranu i sigurnost BiH primili su Tomislav Čuljak, potpredsjednik Hrvatskog sabora, te predstavnici Odbora za odbranu i Odbora za unutrašnju politiku i nacionalnu sigurnost Hrvatskog sabora: Tomislav Ivić, predsjednik Odbora za odbranu, Josip Đakić, Igor Dragovan i Sandra Petrović, članovi Odbora za odbranu, te Miroslav Tuđman, predsjednik Odbora za unutrašnju politiku i nacionalnu sigurnost Hrvatskog sabora.

Tokom sastanka predstavnika radnih tijela parlamenata dvije države razmijenjena su mišljenja o pitanjima parlamentarnog nadzora u sektoru odbrane i sigurnosti u Bosni i Hercegovini i Hrvatskoj, naročito sa aspekta kontrole budžetskih izdvajanja u oružanim snagama, nadzora uvoza, izvoza i tranzita naoružanja i vojne opreme, rješavanja pitanja viška personala u oružanim snagama dvije zemlje te borbe protiv terorizma i organiziranog kriminala.

Predstavnici Zajedničke komisije su, između ostalog, ukratko prezentirali zastupnicima Hrvatskog sabora rad Istražne komisije oba doma Parlamentarne skupštine BiH za ispitivanje procesa zakonitosti uništavanja municije i minsko-eksplozivnih sredstava, te su razgovarali i o

njihovim iskustvima u procesu uništavanja i skladištenja naoružanja i vojne opreme u Republici Hrvatskoj.

Predstavnici ovih komisija razgovarali su i o mogućnosti pokretanja inicijative za budućom saradnjom srodnih parlamentarnih odbora zemalja u regionu, kako bi se jasno definirali zajednički problemi s kojima se parlamentarna radna tijela koja se bave nadzorom sektora odbrane i sigurnosti susreću u svom radu, te pronašli zajednički modaliteti za njihovo prevladavanje.

Nakon sastanka s predstavnicima Odbora za odbranu i Odbora za unutrašnju politiku i nacionalnu sigurnost, delegacija Zajedničke komisije susrela se i sa zastupnicima u Hrvatskom saboru, koji dolaze iz 11. izborne jedinice u Republici Hrvatskoj Ilijom Filipovićem i Pericom Jelečevićem, tokom kojeg je razgovarano o dosadašnjem radu zastupnika iz Bosne i Hercegovine u Hrvatskom saboru.

Nakon posjete Hrvatskom saboru, članovi Zajedničke komisije za odbranu i sigurnost BiH posjetili su i Ambasadu Bosne i Hercegovine u Republici Hrvatskoj, gdje su se sastali sa N.J. E. Azrom Kalajdzisalihović, ambasadoricom BiH u Republici Hrvatskoj. Tokom ovog sastanka razgovarano je o dosadašnjim aktivnostima Ambasade BiH u Republici Hrvatskoj, kao i o izazovima koji stoje pred Bosnom i Hercegovinom u narednom periodu, nakon prijema Republike Hrvatske u Evropsku uniju.

## **12. 12. 2013.**

Drugog dana radne posjete, članovi Zajedničke komisije posjetili su Policijski nacionalni ured za suzbijanje korupcije i organiziranog kriminala (PN USKOK), koji je u sastavu Uprave Kriminalističke policije MUP-a Republike Hrvatske, a nakon toga i Ured za suzbijanje korupcije i organiziranog kriminala (USKOK), koji se nalazi pri Državnom odvjetništvu Republike Hrvatske.

U ime PN USKOK-a, delegaciju Zajedničke komisije primili su: Krunoslav Horvat, pomoćnik načelnika PN USKOK, Dalibor Jurić, načelnik sektora za podršku Kriminalističke policije MUP-a Republike Hrvatske, te Toni Škrinjar, oficir za policijsku saradnju Ambasade Republike Hrvatske u BiH.

Tokom ovog sastanka članovi Zajedničke komisije upoznali su predstavnike PN USKOK-a o nadležnostima Komisije i o dosadašnjim rezultatima njenog rada u okviru nadzora nad radom odbrambenog i sigurnosnog sektora u BiH. Posebno je apostrofirani nadzor nad radom Ministarstva sigurnosti BiH i agencija za provođenje zakona koje se nalaze u njegovom sastavu na provođenju Strategije borbe protiv terorizma i Strategije borbe protiv organiziranog kriminala. Članovi Zajedničke komisije su od predstavnika PN USKOK-a željeli saznati način uspostave i organizacije ovog ureda, njegove dosadašnje aktivnosti u borbi protiv krivičnih djela korupcije i organiziranog kriminala, kao i pozitivne prakse po ovim pitanjima, saradnju ovog ureda sa USKOK-om i nadležnim odborima u Hrvatskom saboru, te praćenje provođenja strategije i akcionog plana borbe protiv organiziranog kriminala i korupcije.

Predstavnici PN USKOK-a upoznali su članove Zajedničke komisije s organizacionom strukturom Uprave Kriminalističke policije MUP-a Republike Hrvatske i PN USKOK-a, koji je u njenom sastavu, nadležnostima PN USKOK-a i njegovom teritorijalnom organizacijom, kojom su definirani nacionalni, regionalni i lokalni uredi. Naveli su da je PN USKOK uspostavljen 2008. godine, sedam godina nakon formiranja USKOK-a, kao rezultat lociranja pravih problema i izazova u borbi protiv krivičnih djela korupcije u Republici Hrvatskoj. Kao najveći uspjeh u ovoj borbi smatraju upravo sistemsko uvezivanje policije i državnog odvjetništva, odnosno PN USKOK-a i USKOK-a. Naveli su da sa USKOK-om sarađuju na dnevnoj bazi, te da je koordinacija s Državnim odvjetništvom Republike Hrvatske (DORH) na izuzetno visokom nivou.

Nadalje je razgovarano o proceduri izbora direktora i zamjenika direktora PN USKOK-a, uz prezentaciju posebnih uslova koje kandidati za ove pozicije treba da imaju. Navedeno je da svi policijski službenici, s ciljem zaštite tajnih podataka s kojima PN USKOK radi, moraju proći detaljnu sigurnosnu provjeru.

Govoreći o dosadašnjoj praksi u borbi protiv krivičnih djela korupcije, naveli su da PN USKOK ima elemente represivnog organa, ali da svoje svakodnevne aktivnosti usmjerava prvenstveno ka preventivnom djelovanju.

Na kraju su naglasili da postoji dobra saradnja MUP-a Republike Hrvatske sa policijskim agencijama iz BiH na svim nivoima vlasti.

Nakon PN USKOK-a, predstavnici Zajedničke komisije za odbranu i sigurnost BiH boravili su u Uredu za suzbijanje korupcije i organiziranog kriminala - USKOK-u. Delegaciju su primili Dinko Cvitan, direktor, i Nataša Đurović, zamjenica direktora USKOK-a.

Tokom ovog sastanka predstavnici Zajedničke komisije za odbranu i sigurnost BiH upoznali su rukovodstvo USKOK-a sa svojim dosadašnjim aktivnostima u okviru parlamentarnog nadzora nad provođenjem Strategije borbe protiv organiziranog kriminala, čiji je nosilac Ministarstvo sigurnosti BiH, kao i nadzora nad provođenjem Strategije za borbu protiv terorizma. Osim toga, prezentirali su dosadašnja iskustva Bosne i Hercegovine u borbi protiv korupcije, kroz rad Agencije za prevenciju korupcije i koordinaciju borbe protiv korupcije, kao i iskustva Parlamentarne skupštine BiH kroz demokratski nadzor nad radom ove agencije kroz rad Komisije za izbor i praćenje rada Agencije za prevenciju korupcije i koordinaciju borbe protiv korupcije. Predstavnici Zajedničke komisije iskazali su svoj interes za pozitivne prakse koje je USKOK imao u svom dosadašnjem radu na prevenciji i borbi protiv korupcije i organiziranog kriminala u smislu zakonodavstva i njegovih dosadašnjih izmjena i dopuna, realizacije strateških dokumenata, kao i pozitivnih iskustava u radu USKOK-a u dosadašnjem periodu.

Predstavnici USKOK-a prezentirali su unutrašnju organizaciju ovog ureda, te dosadašnje rezultate rada, s posebnim naglaskom na koordinaciju ovog ureda sa PN USKOK-om na otkrivanju i procesuiranju krivičnih djela korupcije i organiziranog kriminala. Naglasili su da je USKOK primarno represivno tijelo, koje se nalazi u sastavu DORH-a, kao samostalnog i nezavisnog tijela definiranog Ustavom Republike Hrvatske. Osnivanje ovog ureda isključilo je postojanje posebne agencije koja bi se u Republici Hrvatskoj bavila pitanjem borbe protiv korupcije, kao što je to slučaj u BiH ili u Sloveniji.

Na početku svog rada USKOK je najveću pomoć dobio od međunarodne zajednice, i to prvenstveno putem španskog CARD projekta, pa preko drugih projekata koje su finansirali Velika Britanija, Španija, Njemačka i Holandija, pa sve do IPA fondova Evropske unije.

Govoreći o zakonodavstvu i strateškim dokumentima, naveli su da je Hrvatski sabor u pet navrata donosio izmjene i dopune Zakona o USKOK-u, jačajući na taj način ovlaštenja koja ovaj ured ima u borbi protiv korupcije. U tri navrata donošene su strategije za suzbijanje korupcije i akcioni planovi za provođenje tih strategija.

U pogledu sadardnje s Hrvatskim saborom, naveli su da DORH jednom godišnje podnosi izvještaj o stanju i kretanju kriminaliteta u Republici Hrvatskoj.

Naglasili su da je u okviru Hrvatskog sabora formirano ***Nacionalno vijeće za praćenje provođenja Strategije suzbijanja korupcije***, kao nadzorno tijelo Hrvatskog sabora, koje ima proaktivnu ulogu u nadzoru nad provođenjem Strategije. Nacionalno vijeće ima 11 članova. Pet članova su zastupnici iz Hrvastkog Sabora, dok ostalih šest članova u Nacionalno vijeće predlažu poslodavci, sindikati, NVO koje se bave problemom korupcije, akademska zajednica, stručnjaci i mediji. Na čelu Nacionalnog vijeća je zastupnik iz opozicije u Hrvatskom saboru, dok je potpredsjednik iz stranaka parlamentarne većine. Mandat članova Nacionalnog vijeća traje do isteka mandata saziva Hrvatskog sabora. Osim nadzora nad provođenjem Strategije, Nacionalno vijeće potiče i organizira tematske rasprave vezane za sprečavanje korupcije, te predlaže mjere za daljnje unapređenje antikorupcijske politike.

Dosadašnje iskustvo pokazalo je da je potrebno ojačati ulogu Nacionalnog vijeća. Izmjenama Odluke o Nacionalnom vijeću za praćenje provođenja Nacionalnog programa suzbijanja korupcije i izmjenama Pravilnika o sistematizaciji radnih mjesta u Hrvatskom saboru, kojim je Nacionalnom vijeću dodijeljena administrativno-tehnička pomoć, dodatno je ojačana uloga Vijeća i omogućena njegova proaktivna uloga u provođenju Strategije.

Zaključujući svoje izlaganje s dosadašnjim rezultatima rada USKOK-a, direktor je naveo da je ovaj ured u periodu od 2006. godine do danas procesuirao 2068 lica. Od tog broja, čak 65% njih je dobilo bezuslovne kazne zatvora, dok je svega 4 % tih lica dobilo oslobađajuću sudsku presudu. Kao ključne faktore za ovakve rezultate primarno je naveo postojanje čvrste političke volje glavnih aktera u Vladi Republike Hrvatske, a nakon toga i uspostavu međuagencijske saradnje na svim nivoima u borbi protiv korupcije i organiziranog kriminala.

PREDSJEDAVAJUĆA KOMISIJE  
**Duška Majkić**

Dostavljeno:

- naslovu
- a/a